



焦太史編輯國朝獻徵錄卷之三目錄

戚畹

贈揚王陳公

贈徐王馬公

贈滁陽王鄭公

彭城伯張景

惠安伯張昇

會昌伯孫忠

錦衣指揮使孫璉

會昌侯孫銘

慶雲伯周能

瑞安侯王源

安仁伯王濬

壽寧侯張巒

慶陽伯夏儒

昌化伯邵林

安平侯方銳

指揮僉事黃琮

固安伯陳景

武清伯李偉

西吳郎文暉

全校

吳興茅元儀

錢塘徐象揆刊行

焦太史編輯國朝獻徵錄卷之三

戚畹

贈楊王陳公神道碑

宋 濂

皇帝恭膺大寶式展孝思既追崇 祖宗四代帝號

建立 太廟復念 皇太后之所自出追封外王父

為楊王外王母為楊王夫人建祠於 太廟之東歲

時遣重臣致祭近有來自淮陰者言王墓在盱眙如

故 上聞之悲喜交集即詔內臣及圓丘署令往祭

而修治之置灑掃之戶凡三護視瑩域且命詞臣撰

文以樹諸神道 臣濂伏讀 御製王之行若曰王姓

陳氏世爲維揚人不知其諱當宋之季名隸尺籍伍符中從大將張世傑扈從祥興帝駐南海至元己卯春世傑與元兵戰師大潰士卒多溺死王舟亦爲風所破幸脫死達岸與一二同行者累石支破釜煮遺糧以療饑已而糧絕計無所出同行者曰我等自分必死聞髑髏山有死馬共烹食之縱死亦得爲飽鬼不識可乎王未及行疲極輒晝睡夢一白衣人來謂王曰汝慎勿食馬肉今夜有舟來共載也王以爲偶然未之深信俄又夢如初至夜將半夢中髣髴聞櫓聲有衣紫衣者以杖觸王之胯曰舟至矣柰何不起

王驚寤身忽在舟中見舊所事統領官時統領已降於元將元將畏舟壓凡有來附者擲棄水中統領憐王亟藏之皇板下日取乾餼從板隙投之王掬以食度王之渴乃與王約以足撼板王卽張口向隙受漿居數日事將洩皆彷徨不自安忽颶風吹舟盤旋如轉輪久不能進元將大恐徧求於禱祈者不可得統領知王能巫術遂白而出之仰天叩齒王若指麾鬼神狀風濤頓息元將喜因飲食之至通州賚王數鉅魚送之登岸王歸維揚不樂爲軍伍避去盱眙津里鎮擇地而居以巫術行王無子生二女長適季氏次

卽皇太后晚以季氏長子爲後年九十九歲而夢
遂葬焉今墓是已臣濂聞之君子之制行能感於人
固難而能通於神明爲尤難今王當患難危急之時
神假夢寐挾之以升舟非其精誠上通於天何以致
神人之祐而至於斯也王之羣行其詳雖若不可知
舉此而推之則其積德之深厚斷可信矣是宜慶鍾
聖女誕育 皇上以啓 大明億萬年無疆之基於
乎盛哉昔日史臣贊堯之德首以親九族爲言其效
至於黎民於變時雍之盛然九族之中母族居其三
皇上以念母之故思王不能忘封以王爵享以祠

廟今又樹碑墓道以紀其異行是皆以孝治天下也
將見四方嚮風咸知以孝自勉皞皞熙熙臻夫隆平
之治不難矣臣濂旣序其事復再拜稽首而獻銘曰
皇帝建國克展孝思疏封母族自親而推錫爵維揚
地邇帝畿立廟崇祀玄冕袞衣痛念宅兆卜之何墟
閭師來告今在盱眙皇親悅豫繼以涕洟卽詔禮官
汝往葺治母俾蕘暨跳踉以嬉惟我揚王昔隸戎麾
猗風蕩海糧絕阻饑天有顯相夢來紫衣挾以登舟
神力所持易死爲生壽躋期頤積累深長未究厥施
乃毓聖女茂衍皇支蘿圖肇開鴻祚峩巍日照月臨

風行霆馳自流徂源功亦有歸無德弗酬曲禮可稽
聿昭化原扶植政基以廣孝治以惇民彝津里之鎮
王靈所依於昭萬年視此銘詩

贈徐王宿州馬公廟碑

陶凱

洪武四年夏六月丙申皇帝御皇宮門召禮部尚書
臣陶凱諭之曰皇后父徐王馬氏世爲宿州人家閭
子鄉新豐里王本民家素質朴以兄弟齒序人稱之
曰馬某王少壯時膂力過人沈毅寡言笑重然諾而
壯強剛疾惡見有爲不義者視之若仇讐然或少忤
其意輒肆毆擊雖至死無所畏憚鄉人莫敢犯當元
政失馭天下將亂王以忿爭殺人恐逮於法移家定
遠及天下大亂乃挈皇后母避兵他所而以皇后託
定遠郭氏俾育爲己女後郭氏首難自爲元帥收鄉

民兵朕亦爲部下士遂以皇后爲朕之配既定天下
卽皇帝位皇后正位中宮封皇后父爲徐王母鄭氏
爲徐王夫人以他無繼嗣因立廟於太廟之東歲時
奉祭然稽諸典禮古無其義于是卽王所居鄉里闢
地于塋封之南作新廟奉安神主每歲以春秋仲月
俾有司祇奉祠事爾宜述其梗槩刻諸堅珉用垂不
朽臣凱旣受明命竊惟人受天地之氣以生其得氣
之厚而不薄者性必剛勇果毅然有不得志於當時
而澤及於其後者必顯融光大此理勢之自然也今
王有所抱負而無以發舒故常存疾惡之心其憤怒
所洩卽以加諸人蓋亦豪傑之士哉使遭逢盛際必
能出將入相垂名簡冊而乃生不逢辰至身歿之後
以皇后父而得追崇王爵作廟故鄉使山川改觀井
里增輝又豈非一出于天乎臣凱謹拜手頓首而爲
之銘曰維此徐方代生異人乘時啓運蔚爲王臣惟
王之生質性過厚不逢昌時深居猷畝王奮厥怒孔
武有赫摧強折奸以輔彝則當元之季天下擾攘挈
家避地東南其行英雄陸沈豪傑未起抱恨重泉吁
嗟已矣山川炳靈遺德所鍾篤生聖女正位中宮皇
帝仁聖爲天下父皇后孝慈爲天下母太妣嗣任則

百斯男聖子神孫累千萬年川原膺膺新廟奕奕與
國同光永世無斁

贈滁陽王定遠郭公廟碑

張來儀

洪武十六年十一月七日皇上親藁滁陽王事實召
太常寺丞臣張來儀諭之曰王之恩德注在朕心今
滁有廟祀而碑刻未具甚闕典也汝其據此爲文於
石臣來儀謹拜奉命謹按王諱子興姓郭氏其先曹
州人王父少好術數常與異人遊得其書年長未娶
南遊定遠邑人神其術將有爲叩之必驗邑中富翁
家有處女以瞽未許嫁王父過其門翁以女命求卜
數成曰此貴人也翁曰瞽未配王父曰翁能不鄙我
乎則妻之翁曰諾旣而娶不數歲夫婦家贍生子三

女一王中子也始生父卜之喜謂人曰是兒得佳兆
異日非常人必大吾家既長兄弟別籍三人皆善殖
產元末民間有造言者王誤中其說信之甚篤忽不
事作業而妄散家財陰結賓客至正壬辰汝穎兵起
王識天下當變乃召所結賓客子弟拔濠梁據之時
皇上潛住居民間爲譌言所逼懼禍將及挺身入濠
梁抵其城爲門者所報將欲加害人以告王王親馳
活之撫之麾下間召與語異之取爲親兵居數月王
謂曰汝單居當爲汝婚王暮歸與夫人飲食語及斯
事次夫人忽惋惜謂王曰方今兵亂正當收召豪傑
是子舉止異常若不撫於家而使爲他人之親是
智矣王悟遂以女妻孝慈皇后是也王爲人勇悍善
戰時軍帥四人名位皆在王上王素剛直不屈人下
每遇事四人瞋目語難而王剖決通敏數以非語侵
之衆故含忿未幾客軍首帥彭趙以兵來駐濠二姓
皆僭稱王王等遂爲所制一日衆挾趙勢拘王于獄
將害之皇上自軍馳歸或曰勿徃曰再生父母有難
可不赴乎遂入王家明日彭帥聞遣人釋王以歸明
年夏還故里收元卒七百獻王王就令將之又明年
夏染木疾未差王聞元義兵欲歸將說之左右無可

使特過寢門示意趙起因請扶疾往卒說降之得其精卒三千既而彭趙東屯泗州因挾王以往時皇上方駐滁陽知衆不可共事獨堅守以待復遣人賂彭趙左右賂行王得縱歸滁陽王兵共四萬其麾下僅萬人皇上所部三萬有奇明年乙未王命守和陽既而信流言親至和陽視師值王讐人亦駐其中聞王至移軍異處皇上禮送行者俄爲所難王聞驚得疾尋卒歸葬滁州夫人張氏生三子長戰歿次爲降人所陷幼與羣小陰謀伏罪次夫人張氏生女一爲妃生蜀土豫王如意王女二洪武元年天下旣一剖符行封追思更生之恩寔帝業所始乃封滁陽王建廟墓陽命有司歲率滁人祭之臣來儀伏聞自古帝王之興雖受命于天未始不因乎人蓋必有所祐助維持之者亦得與以享其榮傳之無窮而施之罔極惟我皇上奮布衣提一劍而起外無尺土一民之助而王能脫危難識潛微納于貳室投以兵柄慨然不少吝惜遂肇大業可謂有知人之鑒矣及今大統旣定四海一家推本尋源寔由于王爰建顯號俾永永血食蓋非王無以開萬世之業非皇上無以求王之名臣謹卽是爲銘銘曰皇受天命發跡濠梁方其始興

附于滁陽滁陽先知識聖於微聖有大難王脫其羈
取被神龍翼之風雲浴日咸池滌其垢氛龍騰日升
伊誰之功有相自天寔啓王衷皇奮無旅王命予之
皇室未媿王命女之謀行諫從肝膽弗疑萋菲之言
終莫我離秉鉞專征付以闔外顛強蹙驕有衆日大
變生于意卒疾于驚何啓其緒弗享其成皇明日昌
既臣萬方剖符錫爵乃侯乃王爰念舊恩極天罔報
一飯必酬矧有大造乃封大郡乃建廟庭乃復滁人
護其園塋祠官孔嚴報祀春秋壘酒釧羹黍稷羊牛
王其來歆母曰無後王女皇妃三王挺秀王支百世
上有廟祀焚焚者雄孰王之似小臣受詔作此銘詩
勒著貞珉以永無期

特進榮祿大夫柱國彭城伯張公墓誌銘

楊士奇

張故歸德永城名家其先積善累仁世有紹續迨其
高曾克而益弘高祖諱文銘妣宋氏曾祖諱景惠妣
劉氏祖從義妣朱氏考諱麒洪武中仕至昭勇將軍
指揮使未樂辛卯追封奉天翊運保義武臣特進榮
祿大夫柱國彭城伯諡恭靖甲辰仍追封三代考妣
皆進彭城侯及侯夫人恭靖爲人敦厚闔爽務義施
德秉忠事上始終一心母仝氏累封彭城侯夫人恭
儉慈仁言動率禮內德之懿化成于家今太皇太后

母也恭靖子男女皆三公爲家子諱景儀狀豐偉篤實和易表裏不二旣冠時仁廟爲世子公奉命宿衛文廟靖難之師出公仗劍以從東取大寧還戰鄭村琪連大捷以功超授義勇中衛指揮同知遂援薊州敗遼東軍之攻薊州者追奔至榆口而還自是侍衛守北京南軍圍城公旦暮效力其間永樂二年以功陞本衛指揮使三年調金吾右衛五年調錦衣衛十四年調府軍右衛二十二年陞中軍都督府左都督是歲冬命爲奉天翊衛宣力武臣特進榮祿大夫柱國彭城伯食祿一千五百石子孫世襲明年侍衛宣

廟謁孝陵歸奉命總督操練右哨軍馬正統元年患疾上遣太醫院官督醫視療竟以不起三年六月三日也春秋六十有五公平居孝於父母友愛諸弟祗事四聖小心恭恪以勲以戚爵位累加禮遇之隆錫賚之厚執謙秉和居靜守約循禮奉法深戒滿盈家庭中外以清以肅故其薨也計聞特遣中官監視喪事命禮部賜祭工部賜賻營葬葬以薨之歲某月日墓在某縣某鄉某原其配宋氏累封伯夫人子男八人長輔次輅府軍右衛指揮使先卒輓越府羣牧千戶輓越府典寶軾襄府羣牧千戶輓輅女二人

孫男女三人自古外戚有賢有否賢者克保富貴延
被子孫否則不旋踵而僨復隨之固在上者失馭之
之道也我國家自洪武末樂以來致厚戚里親之以
恩約之以禮如張公者既藉累世之德善又修恭儉
之行斯其家之興所以愈久而愈盛者歟

特進榮祿大夫柱國惠安伯永城張公壙誌

公諱昇字叔暉今太皇太后季兄也世居河南永城
高祖文銘曾祖景惠祖從義世以積善相承考麒以
勲戚任指揮使追封彭城侯妣仝氏封侯夫人三代
祖考皆追封彭城侯妣皆追封夫人伯兄杲襲彭城
伯卒子再襲仲兄旭府軍衛指揮使公初以城守功
授義勇衛正千戶永樂三年陞羽林前衛指揮僉事
調府軍衛七年授誥封昭勇將軍十二年隨駕北征
二十二年陞後軍都督同知洪熙元年陞左都督宣
德元年宣宗皇帝征武定州三年巡邊俱命分守北

京四年上優禮至親命輟左府事朔望奉朝請凡朝廷有大政事亦預議後奉太皇太后命弗預正統五年封惠安伯授奉天翊衛宣力武臣特進榮祿大夫柱國歲祿米一千一百石賜誥券子孫世襲六年正月十三日以疾卒壽六十有三計聞上深嗟悼輟視朝一日遣官諭祭勅有司賻葬太皇太后遣官致祭以是年二月某日葬宛平壽安山先塋之次公爲人端重孝友之德夙著于家閨門整肅教諸子有方平居簡默臨事卓有定見歷事四朝公勤忠謹未嘗有過官廟爲皇太孫時往來兩京及隨侍太宗文皇帝

北征皆命公保衛出入起居深有規益退而未嘗形於言官廟以保衛功嘗欲加封爵固辭其居顯官恒自謙抑每陞拜祗畏如不勝其臨政事必咨詢同官審擇而行不恃已其與人交尚道義遇文學士必加禮敬服食尚儉素絕無富貴態而急於利人常施藥石以療人疾爲糜粥以濟饑者公少畱心載籍至老不倦徃古見及忠臣孝子端人正士每遇事輒以訓諸子偶燕居諸子侍適雷雨暴至公肅然曰語云迅雷風烈必變學者不可不慎臨終召諸子語之曰吾素無功德朝廷篤念親親與以高官一家祿食莫能

報稱喪事不可干朝廷宜從節儉依文公家禮無作佛事無徇世俗爲葬儀費財勞人無久停柩于家母煩費親戚朋友葬宜深坎毋高爲墳塋吾所注意者不幸長子蚤喪孤孫數人諸子宜加保愛爾等能體我心則爲孝配王氏封夫人子男六長軼襄府典寶次軼次輪府軍左衛指揮使次輶次軼次輶軼輶先卒嗚呼前代勲戚賢否得失具載信史世爲勸懲若公者可謂生順死安生榮死哀者矣雖沒以中壽而不亡者遠爰述其槩用納諸壙以示永久云

特進榮祿大夫柱國會昌伯太傅安國公謚恭

憲孫公神道碑

李賢

我國家制度文爲迥超前古凡勲舊大臣生榮死哀之禮務極詳備至於外戚之賢者待之尤極其厚蓋天理人情之至誠不可得已者然亦不多見焉今見太傅安國孫恭憲公一人而已公聖烈慈壽皇太后之父也距薨已八年而夫人董氏卒訃聞宮庭哀悼上輟視朝一日凡白金寶鏹布帛之類祭葬之禮率異常例旣襄事復命臣賢爲撰合葬神道碑銘用昭公與夫人善行于來世嗚呼休哉公諱忠字主敬姓

孫氏世家濟南之鄒平高祖而上代有顯宦曾祖復
初父仕英俱不仕以公貴皆追封會昌伯曾祖妣張
氏祖妣高氏俱贈夫人妣丁氏封太夫人公自幼端
重祖父母尤鍾愛之嘗相謂曰此兒風骨不凡必大
吾門者惜吾輩不及見也一日忽患疾腫氣塞舉家
驚救無措是夜父夢神人曰上帝鑒汝陰德命吾醫
汝兒汝母恐覺聞公口果有藥香病遂愈嘗與里中
羣兒嬉戲公獨自重餘皆呼呵擁護見者異之曰此
貴兆也稍長知向學乃選入邑庠卽力學不怠久之
入貢太學聞見益廣洪武己卯擢山西介休簿邑素
號難治令丞已爲豪橫所梗公至凡不率者悉置諸
法不旬日政聲振尋以外難去服闋調河南永城時
營造天壽山陵寢公率邑夫赴工撫恤惟周他邑夫
多亾去公所部者俱存督理總戎嘉其能召與計事
凡所需悉以委公事竣內補鴻臚序班時宣廟爲太
皇孫將議婚仁宗昭皇后之母太夫人知公第四女
有淑德太宗文皇帝特遣彭城伯張昺奉太夫人之
永城選至京立爲皇太孫妃洎宣廟踐祚冊爲貴妃
陞公驃騎將軍中軍都督府都督僉事賜宴并錦袍
犀帶宣德丁未今上皇帝誕生冊貴妃爲皇后越三

年進封公推誠宣忠翊運武臣特進榮祿大夫柱國
會昌伯食祿千石子孫世襲復賜誥券追封三代遣
公還家燎黃以中官隨仍幸其第慰問甚至未幾太
夫人卒公乞奔喪復遣中官督葬事又嘗念公居第
湫隘欲命工撤而新之公懇辭曰自臣視之已爲寬
矣勞人費財非臣所安也遂止公嘗語諸子曰吾家
幸居戚里富貴已極爾等宜知止足庶可以保名位
諸子奉教惟謹公天性樂善好義鄉人有鰥而謫戍
者周之不倦及卒葬以地有罷職而不能舉喪者助
之棺衾而恤其家有受誣而謫戍者力爲伸雪薦用

之有左遷嶺廣囊無一錢者贖以金有坐受賂而貧
無貸者爲償以其數有遺女無依者備粧奩以嫁有
罷爵無腴田者推以與之有蒼頭詐取人財者代償
而遣之歸凡善行不可勝紀忽疾作朝廷命醫往治
不效疾亟謂子曰吾起寒微不自意姻媿戚畹身都
顯爵實在望外柰何起家難保家不易汝輩勉之言
畢而逝在景泰三年九月十七日距生洪武元年七
月三日享年八十有五朝廷聞訃勅有司營葬于宛
平縣西香山之原追封會昌侯謚康靖天順改元皇
上復位首念公復追封奉天佐理推誠宣力武臣特

進光祿大夫右柱國太傅安國公改謚恭憲太夫人
董氏加封安國夫人夫人諱元貞公同邑人父彥恭
母齊氏皆邑之好善家夫人自幼莊重寡言旣笄歸
公闔家宜之及公爲邑庠生夫人同其清苦佐以勤
儉公歷邑簿夫人與俱凡服御如韋布妻未嘗有所
增益有饋物者必嚴拒之用是公有水漿聲而夫人
家範益肅旣封夫人常被召入內小心慎密未嘗一
語及外事出則未嘗一語及內事雖賚與駢蕃若不
與者凡公濟貧恤孤施予之際夫人未嘗不極力贊
之至于兩嫁孤女夫人之力尤多而待媼族御僮婢

一於恩惠每遇歲時集子孫於前諄諄戒諭謂貴而
能謙富而好禮乃處已良法公沒有欲以烈禍中公
家者事勢恟恟夫人教諸子靜以守之卒消其變天
順以來夫人壽益高福益備子孫益盛而朝廷篤念
外戚之意益厚一門榮顯前代無比已而遘疾上命
醫往治遣中官問安相屬於道旣愈復作至彌留乃
召諸子囑之與公治命一同夫人生于洪武二年七
月十七日卒天順四年四月四日享年九十有二卜
以是歲五月十五日啓公窆而合葬焉子男五人長
繼宗會昌伯以翊戴功封侯次紹宗顯宗俱都指揮

同知次續宗都指揮僉事次純宗錦衣衛指揮僉事
女九人皇太后居四

昭勇將軍錦衣衛指揮使孫公墓誌銘

程敏政

公諱璉字國用姓孫氏濟南鄒平人孫氏自故安國
恭憲公以宣宗章皇后之父顯其子今太傅會昌
侯繼之巋然國之元舅胤系日蕃家法滋備若公
亦可謂稱其家兒者矣然壽不逮其爵君子惜之公
生而淳謹不與諸貴游相將恭憲公鍾愛之諭今太
傅曰此子必克荷吾門宜善視之稍長出就外傅通
經史大義學詞翰皆有可觀雅嗜古名賢書畫及山
石花竹之勝以自適凡聲色寶玩若不介意今太傅

既嗣伯爵天順初以翼戴功進封侯公遂以世嫡嗣
太傅之舊官爲錦衣衛指揮使雖貴富而所處益謙
無一毫侈倨之態今太傅總五軍幾二十年公長贊
畫其間戲下之人多以濟而綜理家政尤克當太傅
之心內外僮僕咸職其職而不敢肆與二兄瓚珍及
羣從極親友歲時設燕奉諸父于堂以次稱壽驩如
也諸勲戚家以爲美譚一或有不睦者卽相率以孫
氏諭之公居母夫人丁氏喪哀毀甚或勸止之曰太
傅春秋高二兄方有事西南夷自愛公泣謝曰惟送
歿可以當大事執禮彌篤卒襄事得辱疾幾數載弗
愈恐貽父兄憂恒勉強若無疾迨疾革惟對人垂泣
以弗獲終養爲恨諭其子曰孝事吾親勤學以無玷
先範吾目瞑矣成化丁酉三月二十二日竟不起得
年三十有六配蔣氏定西侯貴之孫先公沒繼湯氏
叅將胤勛之女俱封淑人子一人鎮異日當嗣侯者
張氏其生母也

太保會昌侯孫公神道碑

毛澄撰

正德庚辰三月二十四日太保會昌侯孫公銘卒于位

上聞之悼惜輟視朝一日諭祭十有四壇賜齋糧麻布各若干命有司營葬域如制於乎

朝廷眷念勲戚老成之臣恩禮所加可謂至矣然非公忠勤

素著上結主知亦何以得此哉公諱銘字日新世家

山東濟南之鄒平曾祖諱忠由國子生歷任河南永

城縣丞篤生淑女簡入爲宣宗章皇帝妃累官中

軍都督僉事英廟登極以誕育恩封推誠宣忠翊

運武臣特進榮祿大夫柱國太保會昌伯年九十三

終贈太師安國公謚康靖配董氏封伯夫人祖諱繼
宗襲伯爵南城翊戴 英宗復辟進封會昌侯命總
督五軍營掌後軍都督府事凡遇 經筵侍班國有
大事與會議我 朝外戚不預政繼宗以勲德特命
之時以爲鮮 憲宗朝監修國史書成加太傅沒贈
郊國公謚榮襄配丁氏封侯夫人父諱璉錦衣衛指
揮使未襲爵卒追封會昌侯配蔣氏定西侯琬之女
繼湯氏信國公之孫女生母張氏錦衣千戶貴之女
俱封侯夫人公以成化庚子襲祖爵自幼莊重沈毅
脫去綺紈之習嗜讀小學武書習射藝天性甚孝每
痛父早逝思慕至廢寢食事母敬養備至後請於

賜

誥褒贈其心始慰曰人子之至願庶其少遂乎

立身嚴慎處事詳審雖居勲戚而不改儒素之風尚
禮敬賢人多稱之累命冊封親藩餽遺一無所受歲
時遣祀陵必敬以將事癸卯兵部推公管理三千營
弘治辛酉遷五軍營轉耀武營甲子兼理殫忠孝義
二營正德紀元改坐奮武營尋掌府軍前衛事己巳
薦提督神機營軍務僉後軍都督府事西夏平以功
加太保賜金牌綵幣公歷典兵戎克修厥職軍士畏
威懷德退無間言而騎射閑熟一時武臣尤爲稱首

先帝嘗御大內演武公以技能稱上意賜蟒衣寶鈔
命掌右軍都督府事轉中軍都督府正德末 上北
巡南征公總營務乃與文武重臣同心協議晝夜憂
勤保固京師中外倚重竟以勞瘁成疾不起屬纊之
際屬其子臬曰予德薄官以世爵兼太保名位已極
恨無以報國恩身後勿請謚贈以重予咎臬遵其言
公生於天順甲申三月七日享年五十有九配汪氏
戚畹都督英之女繼王氏嘉善大長公主之女俱封
侯夫人子男一卽臬承世爵才畧有父風娶顧氏鎮
遠侯溥之女

追封慶雲侯周公神道碑銘

公諱能字廷舉姓周氏世家昌平文寧村之柳林系
出漢太尉勃後有諱惠達者仕後周爲尚書僕射徙
順天章武子孫遂居此歷隋唐五代世多顯宦至元
季兵擾家漸中微及公大父諱得清父諱福山皆以
隱德高于鄉祖妣杜氏妣郭氏並有淑德公生而莊
重雅不與羣兒戲大父奇之每語人曰昌吾家者必
此子也嘗教公曰生人之業儒爲上農次之商賈非
所事也公受教惟謹大父卒居喪盡哀稍長讀書植
行事父母以孝聞待宗族有恩意治家男耕女織不

事浮靡遂致家日以裕性喜周貧恤困人有急赴之
惟恐不及有所貸不較其償子弟有事漁獵者禁止
之不欲以口腹傷物命其樂義好善類如此故鄉人
稱爲長者焉元配甄氏同邑右族淑慧孝敬諳女戒
凡事舅姑奉祭祀待賓客莫不各臻於道人稱爲賢
婦焉生女二 皇太后乃夫人第二女也夫人一夕
夢月光屬懷有娠其年蠶大登公與夫人曰此天賜
也不可私乃均惠鄉族旣而卜之得女貴之祥甫十
月 皇太后誕生異香滿室公心私喜比長容德外
盛宣德甲寅 誠孝昭皇后聞之遣使禮聘教習宮

中詩書涉獵禮度熟閑正統甲子

英廟議婚進爲

貴嬪

上生遂冊爲貴妃天順改元

英廟光復寶

祚召見公于便殿擢拜錦衣賜賞金幣遣中貴送至

家自是恩數日益優渥焉甄夫人卒繼室高氏亦有
賢行生子二長卽壽次或公構疾卧床 上命醫來

視遣內臣問安否巷道相屬且給藥餌之需公度不
可起召語諸子曰吾荷 國厚恩無以報汝等當竭

忠守分毋驕奢淫縱以重吾不德言訖而逝訃聞

上傷悼之賻贈有加仍命內臣出襄事合葬甄夫人

墓公生洪武三十一年十月十九日卒天順七年正

月十九日享年六十有六天順八年春 今上卽位
尊 聖母爲皇太后陞壽驃騎將軍左軍都督僉事
贈公及祖考如其官祖妣妣暨甄高二氏皆贈封夫
人尋命內官監爲壽治第于京師復撤新柳林故居
成化改元加壽榮祿大夫都督同知或拜錦衣衛千
戶三年冬進壽慶雲伯 賜階推誠宣忠翊運武臣
特進榮祿大夫柱國食祿千石子孫世襲給誥券追
封公慶雲侯祖及考如之甄高二氏並進侯夫人祖
妣妣亦如之或陞指揮僉事恩禮繁縟滂洽存沒於
乎盛矣是固 皇上體念 慈極深恩推其本原以
及其所自出用致始終眷厚如此妾亦公之祖父蓄
德深厚肇開慶源及公之身又能好義樂善以擴前
人遺德至於克積溥博不可遏已故乃篤生 聖母
迓承天休光輝發越垂于子孫演及無窮夫豈偶然
之故哉

明故太傅瑞安侯贈太師謚榮靖王公墓誌

賈宏

太傅瑞安侯王公以嘉靖甲申五月二十六日卒于
京師之賜第上聞訃震悼輟視朝一日贈公太師謚
榮靖命禮部諭祭工部治葬皆如制又以布粟賻之
公諱源字宗本別號觀瀾其先世居密雲曾祖諱福
洪武初歸附以軍功授密雲中衛百戶福長子壽以
父戰歿襲陞義勇某衛千戶而其弟諱鳳因占籍應
天之上元公祖也鳳子五人其次二諱鎮是爲公父
娶段氏生女上儷 憲祖爲 孝貞純皇后以恩澤

累陟中軍都督而段封夫人公爲 純皇后長弟性
淳厚自少以禮自持成化甲午都督公旣沒遂授錦
衣衛都指揮使壬寅陞中軍都督府同知甲辰封瑞
安伯號推誠宣力武臣階榮祿大夫勲柱國歲祿千
石弘治戊申 孝宗敬皇帝以恭上 聖母尊號爲
皇太后推恩舅氏益祿百石越五年壬子進封爲侯
更號奉天翊運推誠佐理武臣階特進光祿大夫益
祿三百石錫誥券子孫世襲追封其父阜國公母阜
國大夫人曾祖祖之贈皆如公之爵邑曾祖妣高氏
祖妣某氏皆侯夫人癸亥加太保乙丑 武宗毅皇

帝以恭上 聖祖母尊號爲太皇太后恩加太傅
益祿三百石正德戊寅以太皇太后薨又益祿三十
石益自荷爵命寵錫駢蕃昆季子姓重圭疊組可謂
極一時之盛矣而公以恬淡處之服膳輿馬不爲侈
靡田宅自賜予之外未嘗妄有所干常以恭慎率其
家人戒飭僕御無得與細民爭利其賢聲藹然著于
縉紳之間而其居家又甚孝友恨阜國早棄榮養事
太夫人務盡其歡與其弟崇善伯清安仁伯濬手足
之情甚篤太夫人之未老也一錢尺帛必其手出室
無私藏視羣從類於已子鄉黨姻友不敢以貴富加

之雅好書史喜吟咏風晨月夕徃徃延賢士大夫賦
詩飲酒爲樂蓋戚里之好德而文者也故其卒也知
者莫不惜焉公生於天順戊寅五月三十日享年六
十有七配柳氏安遠侯浦女繼孫氏錦衣千戶瑀女
皆封侯夫人子男三長卽橋嗣侯者也好學親賢可
繼公美娶馬氏駙馬都尉誠女繼張氏錦衣指揮岳
女次欄次相俱錦衣百戶女二長適定西侯蔣壑次
尚幼孫男二曰炳曰煒嗚呼自古外戚之家席椒房
之寵欲饜氣盛鮮有不驕奢淫泆以干撓國憲而止
爲后德之累者所謂其居使之然也惟我 純皇后
以樛木之仁衍螽斯之慶其有功於廟社蓋與周之
妊姒同而不私外家志存檢抑又遠過於漢之明德
唐之文德故禮讓之化行于戚屬不戒以孚如公爲
貴介弟乃能持盈守謙深自降抑無一毫憑藉之態
歷事 四帝有譽重而無訾毀論者蓋以樊宏陰識
擬之於是益足以彰 純皇后之德之盛銘以著之
豈不宜哉

安仁伯王公墓誌銘

楊廷和

公姓王氏諱濬字禹勳

太皇太后之季弟也正德

二年十月中

皇上念公二兄皆有封爵而公獨無

特詔封安仁伯於是其母阜國太夫人尚在春秋八

十有六日隨二兄奉觴爲壽公卿以下交賀之每朝

下則兄弟三人錦袍玉帶鳴騶載道鴈行而歸羣從

子弟又皆有仕籍於朝戚里之榮近世所未有也無

何公以暴疾卒訃聞 太皇太后愴悼不已亟遣中

貴人往吊并賜白金彩幣等物 皇上亦遣使以白

金百兩彩幣四表裏寶鏹二萬緡卽賜其家命禮部

諭祭者十六工部治喪仍給米五十石布五十疋爲
賻公之先南京上元縣人高祖諱玉贈都督同知曾
祖諱福祖諱鳳俱贈瑞安侯父諱鎮追封國公謚康
穆母段氏封阜國太夫人伯兄源太傅瑞安侯仲兄
清太保崇善伯公以成化壬寅授錦衣衛百戶弘治
庚戌陞千戶壬子遷指揮使乙卯晉都督同知明年
轉右 今上卽位之元年轉左又明年乃受封伯爵
公性明達年十一失怙二兄教之讀書史講裊身治
家之道旣長孝謹循理與人交退讓不挾暇則從賢
上大夫飲酒賦詩爲樂時時約束舍人輩遵奉家法
或有假聲勢以張皇於外者必痛懲之不恕戚里中
以爲賢夫人薛氏永順循之婦生丈夫子四人長桓
公卒後一月自錦衣正千戶襲封安仁伯次棹官榘
之初次楷次模俱百戶孫男一人尚幼但所生也公
之卒以正德二年十一月二十八日距其生天順甲
申十一月十三日得年四十有四

推誠宣力翊運武臣特進光祿大夫柱國壽寧侯贈太保追封昌國公謚莊肅張公墓誌銘

丘濬

弘治壬子秋八月十一日壽寧侯張公卒于位 皇上聞訃震悼不已輟視朝一日 命中貴治喪事有司營葬具屢遣官諭祭特 勅加贈太保追封昌國公謚莊肅乃以是歲 月日窆于宛平縣香山鄉翠微山之原其兆域蓋奉 詔新卜者也先期治喪事司禮監太監李公榮御用監太監秦公德以故事墓必有碑有誌聞于 朝公之冢子鶴齡以學士李君

東陽所述事狀屬予銘公之墓按狀公諱巒字來瞻其先河南人也後徙山西之徐溝又徙河間興濟故今爲畿內人曾祖諱希信隱德弗耀祖諱迪夔州府知事考諱綬鄉稱善人俱贈壽寧侯公生而穎秀天資開敏兒時應對賓客有成人風甫成童卽知嚮學伯父縉以儒起家教諭交城公偕其從兄岐親受其家教前後爲邑庠生岐登進士第累官至都御史公思齊其兄益加奮勵期以世科相繼然而累試輒負屈稱成化壬寅不得已始循例于大學然其決科之志弗得弗已也歲丁未 今上皇帝在東宮 憲宗

皇帝下詔中外選婚時 聖后生十七年矣遂應選

爲 皇太子妃特授公鴻臚寺卿明年 上登極冊

立 中宮超拜公榮祿大夫中軍都督府都督同知

庚戌封推誠宣力武臣榮祿大夫柱國壽寧伯歲祿

千石贈三代辛亥 皇太子生明年詔建 儲進封

壽寧侯號加翊運二字階加特進光祿大夫餘如故

祿加二百石仍贈其三代賜誥券子孫世襲公出自

儒家一旦承先世積慶之餘篤生 聖后母儀天下

誕育 儲君綿 宗社萬年之祚有功於 國家甚

大是以榮恩侈賜重臻疊降金衣玉食良田甲第錫

予駢蕃天下之人得於見聞者莫不讚歎稱羨以爲當然公畧不改其儒素使者及門稽首拜嘉什藏惟謹曰天下之寶當爲天下珍哉吾家起儒畷一旦托肺腑荷 恩非常非但當爲 國家惜財亦不可不爲子孫惜福也寧藏於無用不敢用以匪彝况吾世業詩書豈可侈然溷於富貴而忘吾世守哉士大夫聞其言咸服其有遠識方幸公列爵武胃中資其清慎儉約以漸染乎勲戚之家使之有所矜式不幸不及下壽居然不起嗚呼惜哉公配金氏封壽寧侯夫人子二人長鶴齡聘 嘉善大長公主女王氏次延

齡尚幼張巒興濟人

孝康皇后父也成化中

皇

后爲東宮妃授巒鴻臚寺卿弘治三年陞督府同知是年冬封壽寧伯食祿千石與世券五年立 東宮巒得進侯加祿二百石是秋卒贈太保昌國公謚莊肅巒本儒家從兄岐舉進士爲按察司副使以戚恩召入臺爲僉都御史言官交劾岐岐亦有吏才巒子鶴齡是年嗣侯十六年秋太監李榮傳旨加太保增歲祿正德中進太傅嘉靖二年三月加太師又加祿三百石是秋以定策功進封昌國公鶴齡弟延齡弘治八年以都督同知封建昌伯食祿千石與世券十

六年進侯加太保祿六百石嘉靖初加太傅祿一百石嘉靖八年盡革外戚封不得世嗣二張亦在革中未幾小張坐法并大張逮獄幾滅族矣自古外戚貴盛莫如西漢慘禍亦莫如西漢如衛青以奴產子數年父子四封侯又二十四年子孫遂無噍類然竊漢龜鼎者竟外戚也我朝 孝慈馬后有賢德兵亂外家無存者父馬公追封徐王歲時祀 仁孝徐后中山王長女本功臣家無封爵其餘官止都督至稱舅氏有封爵外戚封不俟繼世寔始於秦陵秦陵時二張甚橫時時入禁中內臣何文鼎素忠直二張舉窺

御帷文鼎持大爪箠之幾死秦陵亦不罪文鼎當是時二張奪民田廬請官寺舍又豪奴姻親凌官府篡獄囚莫敢詰金玉積如山不厭市津壟斷徃徃皆二張人揚州府同知葉元嘗辱張僕人元至京羣僕入吏部撲元尚書馬文昇護元得免言官時論劾朝廷亦不問近世外戚莫橫於二張至正德時稍稍輯斂乃嘉靖以來益戢戢自謹大張雖以定策功封公然亦不敢視邵蔣務謙退自保尚書胡世寧上言宜保全外戚不宜使後世謂外戚封公自 陛下始顧二張內倚 昭聖外多瑕釁嗜利之人奔走其門生長

短朝廷頗疑二張奸徒劉東山遂奏二張有逆謀朝廷遂決意考問薄昭故事有旨會法司多官議衆亦恐傷 太后意又其事無踪跡且皆先朝事奏從未減 上不喜延齡坐斬鶴齡與南京錦衣指揮閑住延齡又有詞刑書聶賢等稍爲開釋 上怒停刑書俸一年司官下詔獄錦衣衛都指揮王佐力爲推鞫反坐東山等重罪下法司唐龍王相屠僑等言東山情罪深重竟荷校死鶴齡子宗說延齡子宗儉調南京盡沒賜產延齡繫御史獄嘉靖二十五年死於西市

市 考

榮祿大夫柱國慶陽伯一中夏公墓誌銘

靳 貴

正德十年乙亥夏四月三十日慶陽伯夏公卒于家訃聞皇上震悼命禮部諭祭工部營葬事皆如制中宮遣中官致香幣楮鏹奠于賜第慈聖康壽太皇太后皆有奠賻公卿大夫以下咸往弔其子錦衣衛指揮使助等將以冬十二月十五日葬公都城南魏村社之原先期以左春坊左中允兼翰林院修撰劉君龍狀衰經過予請銘按狀公姓夏氏諱儒字宗魯別號一中其先應天府上元縣人永樂間北徙順天府

大興縣因家馬曾祖彥廣祖榮宗考瑄皆贈推誠宣
力武臣榮祿大夫柱國慶陽伯曾祖妣姚氏祖妣廖
氏妣郭氏俱贈夫人夏氏故名族望于南都累世隱
弗耀業嘗中落至公父贈慶陽伯力勤崇儉再興有
家俗習侈糜屏絕不問獨好義于媼親族舊有無共
之族子嘗競產亦遜與之不較聞殍死及無告者買
棺掩骼爲之惟恐後然不以要譽沽名鄉稱厚德長
者必首推焉公資稟淳厚旣與人殊又濡染家訓動
以勤儉忠厚爲尚且涉獵書史所與游多一時聞人
名士非其人不少交天性尤孝事父母能以色養父寢
疾幾三年躬侍湯藥旦暮不離左右夜則焚香籲天
冀以身代一日忽有異香至其拜所疾亦少聞人率
以爲孝感所致天鑒厥祥篤生聖女聖上卽阼之初
慎選淑媛以母天下乃授冊寶立爲皇太后於是夏
之宗一旦赫然光大矣公初授中軍都督府都督同
知無何進封推誠宣力武臣榮祿大夫柱國慶陽伯
食祿一千石賜之誥券長子助錦衣衛指揮使次子
臣錦衣衛指揮同知並授金紫其餘媼戚拜官有差
又賜甲第一區腴田若干頃及蟒衣玉帶諸物皆異
數云公感激遭遇益敦謙慎事事務循護薄以自奉

服食不改其素朝請暇未嘗輕出戶庭子弟臧護告
誠惟謹凡厲民踰節之事一切不爲京師京外若不
知其爲外戚家者縉紳卒然遇之不問亦不知其爲
慶陽狀稱公持德秉禮履盛滿而能仰體德意不驕
不縱於我皇上聖治有光焉其信然哉公晚得末疾
踰二年至是卒距生成化丁亥正月十二日壽四十
有九配葉氏亦名族女懿行純至與公媿德封夫人
子男三人長卽助次卽臣次勲尚幼女三人其二適
魏國公孫徐鵬舉壽寧侯子錦衣衛都指揮使張宗
說孫女二人予嘗與公同朝數接談見其體幹魁梧
言動簡重意當登上壽享景福而不意止此心竊異
之然姻聯帝室爲國元舅身名俱榮子孫並顯正弊
令終天之所以篤厚者亦多矣又奚憾哉

贈特進榮祿大夫柱國昌化伯邵公神道碑

嚴 嵩

聖天子弘化中興因心篤孝蓋嘗仰體皇考獻皇帝
追本之意以遵奉聖祖母皇太后者無所不至又推
太皇太后所自出凡褒卹典禮循先朝待外戚故事
而行者亦無所不至故昌化伯邵公暨夫人楊氏寔
維太皇太后之考妣也先是公與夫人俱早逝權厝
於錢塘北山之青芝塢乃嘉靖乙亥公之孫錦衣指
揮臣輔具疏以聞詔守臣擇地于西湖南屏山之麓
而改葬焉既命工曹徃董其役又賜諭祭一十四壇

給供祀田八頃建祠墓下賜額曰發祥表以石坊中
爲勅命碑亭繚以石垣湖山抱揖寔據佳勝而臣嵩
承命撰文樹諸神道謹按邵公諱林字懋清一字宗
茂其先洛陽人也曾祖某徙揚之興化縣祖壽再徙
杭城父義母彭氏公少而岐嶷長而魁梧倜儻有大
志好善敦義楊夫人式克相之嘗夢鳳鳥翔于其庭
而太皇太后生天順庚辰被選入內庭事憲宗純皇
帝誕育獻皇及岐惠王雍靖王進封貴妃於是贈公
爲昭勇將軍錦衣衛指揮使楊爲淑人今上臨御上
皇太后尊號曰壽安皇太后已而加尊孝惠康肅溫

仁懿順協天佑聖太皇太后進贈公爲奉天翊運推
誠宣力武臣特進榮祿大夫柱國昌化伯楊皆加贈
夫人自公高祖王父而下咸賜贈封而官其子姓諸
從湛恩鴻龐覃被一門於戲盛矣昔有周詩人詠歌
文王之德之所以成實由於聖母之德行純備有以
致之也我皇考之德上媿文王太皇太后之懿增光
京室植本瀦源鍾靈發耀繼摯壬而有作非公與夫
人協德之慶哉邵喜昌化人寓杭州父林 孝惠太
后父也 太后初入宮爲貴妃生 獻皇帝及岐雍
二王喜歷陞錦衣指揮使嘉靖初尊貴妃爲 皇太

后封喜昌化伯食祿千石與世券明年卒謚榮和子

蕙嗣伯五年卒無子族人爭嗣 肅皇帝下吏部議

又令郭勛張璠方獻夫胡世寧李承勛議世寧言

皇上必欲邵氏嗣封蓋推 皇考獻皇帝之所自出

于 孝惠皇太后又推 皇太后之所自出于其父

母邵林楊氏而欲榮富其子孫也不幸林子孫皆絕

今爭襲者乃係旁枝非林子孫其不當嗣明矣臣恐

賜彼一代之爵而或亂彼百代之宗誤我 皇上明

倫之智達孝之仁可不慎乎臣觀江南蘓松諸郡浙

江諸省未有見侯伯世嗣者喜封伯未逾年遂卒傳

其子蕙僅再世而遂絕輔陞指揮弟弼卽天玘三子

長次二人皆以疾廢其不幸門祚之薄如此蓋亦地

氣使然故臣愚以爲與之嗣伯則宜考覈倫序若濫

及旁枝誤及異姓彼弟曰弟彼姪曰姪 太后兄弟

不得以之爲子父母不得以之爲孫他人富貴而本

親告絕幽明之間各生嫌隙生者不得安其養死者

不得歆其祀况門祚薄而福廕隆恐非邵氏之利莫

若停其封爵量與恩澤廕卑流遠乃久長之福七年

春 上特令杰嗣伯八年革外戚封停嗣 封爵考

特進榮祿大夫柱國安平侯謚榮靖方公墓誌

銘

嚴嵩

嘉靖丙午二月四日安平侯方公以疾卒訃聞上爲
悼惜遣中官及祠部郎中一員泚其喪命工部營葬
事賜諭祭凡十有八壇旣又賜謚榮靖方公在朝廷
爲椒房之親恩禮優重宜也公諱銳字廷器世爲應
天江寧縣人祖諱臯占籍錦衣衛因家京師考諱永
妣陳氏公體貌豐厚爲人敦重質實其始浮湛里中
有相者言當大貴公曰吾得爲太平閒民足矣皇帝
嗣位九年詔禮部遴選宮嬪於是今皇后以公長女

入選初冊立爲德嬪公以恩授錦衣衛鎮撫尋陞正千戶后旣正位中宮公陞都指揮使扈從車駕南狩道拜後軍都督府左都督旣封安平伯復進封安平侯實食祿一千七百三十石追贈曾祖祖考皆如其爵妣皆夫人公起徒步至通侯寵異冠一時在恒情鮮不汰侈溢公獨持以謙撝居常自韜戢上嘗賜之第公取足居息不欲大爲營造服用自常賜外未嘗過求非分由是廷中推賢元配夫人孫氏先卒繼夫人侯氏嗣子一人曰承裕公生于成化丁未十一月十五日得年六十卜以是年三月二十七日甲申葬

公于朝陽關之車營

明威將軍神策衛指揮僉事致仕黃公琮墓

銘

公諱琮字進賢世居徽之休寧其先多隱德至考彥
斌甫妻徐氏女生丈夫子七人家始殷里之識者策
黃氏必大貴旣而仁宗昭皇帝臨御冊公女弟爲
貴妃特遣二中貴人驛召彥斌甫至京授神策衛指
揮僉事賜第一區賚予恩數至渥七人者公最長
實待北行上召見喜其重厚亦授錦衣衛百戶未
幾彥斌甫捐館嗣爲神策衛指揮僉事公雅不以貴
戚自盈年六十卽以官授諸孫惟日端居自適而已

成化初 今上皇帝復冊公長孫女爲 秀懷王妃
公之女適王氏者有甥曰增亦選尚 嘉善長公主
爲駙馬都尉公夫婦尚無恙惟時以手加額曰吾家
藉先世之靈迭被 寵光飛香椒畹恨無德以將之
聞者嘉歎成化癸巳九月十二日忽一疾不起享壽
八十距生洪武甲戌二月七日上聞訃遣使者賜蓋
特恩云公配桂氏南京錦衣衛百戶福之女以慈賢
重戚里封恭人公平生孝友事二親存養終慕如一
日諸弟處江南歲時遺問不絕貴妃從葬 景陵每
時祀北望揮涕不已與人交不蓄中對賓客恂恂執
謙如弟子雖貴富而服食儉素惟好善樂施予不厭
子孫滿前佳辰令節奉觴稱壽恒諄諄以盛腆爲戒
敏政嘗與鄉人造公公歛之竟日其貌溫醇其言簡
而不誇有類乎古之仁人長者竊意其享福有自也
公沒後一孫女復選爲 徽王妃孫男鏞亦選尚
嘉祥公主爲駙馬都尉貴戚之盛蓋未有也

固安伯陳公行狀

朱賡

萬曆壬午十一月十四日 聖母仁聖懿安康靜皇
太后父固安伯陳公卒先是公配張夫人卒得法賻
葬朝陽關矣至是以 上命啓夫人之窆而合窆焉
其子嘉言將徵銘鉅公而以某爲鄉人具述公平生
屬爲狀某辭不敏則曰業聞之 皇太后有成命矣
不敢辭公諱景行字希哲松鶴其號系出江西建昌
縣高祖政者以軍功爲百戶世襲徙浙之青田爲浙
人後調河南安吉衛已又調通州右衛遂家焉政生
綱綱生銑三世皆以 太后貴贈固安伯銑娶某氏

實生公公雖出介冑家然性嗜學不廢鉛槧業弱冠
爲諸生高等學使至每擊節奇之顧累試不第嘉靖
辛亥應歲薦鬱不得志將遂謁選天官矣謀之張夫
人夫人故太子少保禮部尚書文質孫也雅讀書知
相法謂公曰夫器宏者恥任以圭撮足逸者難局以
尋常以君而止此安事相也蓋少需焉公領之不果
選戊午 太后選入 裕邸冊爲妃授公錦衣衛正
千戶丙寅 先皇帝踐祚 太后正位中宮晉公爵
固安伯食祿千石封張夫人夫人 今上嗣位恭上
皇太后徽號推恩戚里歲益祿二百石賜肩輿頃

又以 皇子發祥益祿三百廕諸子官爵有差一
貴盛無比人謂夫人曩所言神啓之矣然公性朴茂
愿恪雖珥貂曳玉赫赫貴顯乎乃廩乎若畏冲乎若
無所執每遣祀宗廟山陵及持節冊封妃嬪諸大典
禮必齋戒而後將事欽欽如也上方非時之鮮袞衣
帶玉兼金上尊歲時所錫予者不一公拜賜輒兢兢
至不能承每衣一衣則戒諸子曰若輩不覩吾曩日
青袍乎嘗一食則曰吾藜藿之味猶在口毋相忘也
閒居必引古人寵辱相踵事以爲炯戒嘗曰吾讀漢
史至絳灌等爲諸竇擇師傅賓客卒之長君少君並

爲退讓君子不敢以尊貴驕人此可謂有大造于竇氏若輩其慎交遊毋憑托天地而昵匪人則長有今日矣其持盈守謙類如此公年七十而神色甚王卒之前旬日猶在朝趨蹌亡恙也一日忽病作乃語諸子爲我謝 太后吾幸托肺腑徼 國厚恩始願不及此今不幸先狗馬爲太后憂惟 太后強食自護若輩仍更日詣宮門起居 太后守法循禮毋辱國恩吾瞑矣訃聞 太后哭之慟 上爲徹樂賜東園秘器諸鏹寶幣帛等物無算詔宗伯諭祭十六壇司空繕葬仍賜謚贈官給護勅祠額門名已又出二千金令其家自爲葬費而兩宮聖母中宮妃嬪暨王宮主所賜筐篚載道皆異數云公生正德癸酉七月十六日卒年七十張夫人先公十年卒子四人昌言錦衣衛都指揮僉事娶儒官王佩女繼娶保定侯梁繼璠女嘉言錦衣衛指揮使娶儒官張鑰女善言錦衣衛千戶娶壽官宋蘭女名言錦衣衛千戶娶德平伯李銘女 孝懿皇后女弟也女長適錦衣衛武舉官馬應鵬次卽 皇太后孫十一人承恩錦衣衛勲衛娶本衛指揮僉事郭尚文女承爵京衛武學肄業勲官娶寧晉伯劉斌女承德錦衣衛千戶娶武舉

官高岐女承宗承廕承嗣承詔承光承裕承順承壽
俱幼孫女五一適駙馬都尉謝詔孫國子生文衡一
適太子少保兵部尚書張瓚孫武舉生一麟餘未字
曾孫四正誼正謨正譔正諫曾孫女三公之爲諸生
也思吐奇厝畫有四海之心何壯也迨其爵五等彌
自抑畏恂恂不失故步若無意于世味者斯其處貧
賤富貴類聞道矣老子云知其榮守其辱爲天下谷
公豈嘗遵其術耶蓋竊聞 皇太后幽閑貞靜以天
下養而不與方日誦黃老貽海寓清寧之福有自哉
有自哉謹次第口語爲狀俟立言君子采焉

武清侯贈太傅安國公謚莊簡李公行狀

王家屏

公諱偉字世奇別號毅齋其先出山西平陽府翼城
縣代有顯者未樂初曾大父政從 文皇帝靖難軍
占籍順天府之灤縣遂爲灤人大父岡父玉俱以公
貴贈武清侯母某氏贈夫人公生有異質童時與羣
兒嬉里中偶羽衣道士過其前驚眄語人曰此男骨
相奇偉異日當大貴位極人臣宜善視之大父聞其
語獨喜撫愛異于諸孫常摩其頂曰聞先人言吾上
世累德幾數百年後當大發豈在茲乎遂命其名曰

偉從羽衣之言也公家故饒比長受室家漸落入或
訝羽衣言大謬嘉靖丙午春公夜夢空中雲五色承
輦旌幢鼓吹導之下直達寢所驚寤倉皇攬衣起猶
隱隱若車騎紛綸狀鄰舍多與聞者不解何祥其冬
十一月 聖母慈聖宣文明肅皇太后降里中異香
彌旬不散司候言后星見燕分直帝城東南其地女
家多喜自負莫能當之者庚戌秋虜闖近郊畿輔戒
嚴公始攜家入京居數歲 聖母儷 莊皇帝裕邸
癸亥誕今 上公乃悟羽衣言與嚮所夢悉徵客有
賀公者公輒遜謝此宗社之慶也豈臣下所敢徼福

隆慶改元

莊皇帝推恩戚里授公錦衣衛都指揮

僉事壬申冊立今

上爲東宮加公中軍都督府都

督同知是年

上嗣登大寶尊

兩宮聖母爲皇太

后晉公爵武清伯追贈三代歲食祿千石賜乘肩輿

尋以昭陵工完及朝宗橋成益祿百五十石戊寅大

昏禮成推尊上

兩宮聖母徽號恩又益祿百石壬

午皇子生晉公爵武清侯仍給三代誥命官兩子皆

都督公蒙受恩眷寵榮無與比而小心畏慎終始如

一凡

聖駕躬祀南北郊若請山陵及幸學耕籍必

命公居守公晝夜部署宿衛士巡警不少懈數奉遣

命告祭太廟及恭請 高皇帝神主配園丘必齋居
熏沐而後將事一登降陟趨咸質諸禮與士大夫處
無崇卑務折節爲恭敬然未嘗相干以私以是縉紳
益雅重之多與之游先後蒙被恩澤所賜第宅莊田
金幣寶鏹之類種種羨溢而自奉甚約凡狗馬聲伎
珍綺玩好之具泊然一無所嗜朔望一食蔬素每晨
起衣冠拜天畢卽望闕遙叩歲時伏臘輒建醮諸寺
觀爲 聖母今 上祝釐以爲常暇日訓勅諸子倦
倦以驕奢爲戒歲入租廩下輒指示諸子此顆粒皆
出國恩宜共惜無溢費又揭 聖母所賜謙謹

持盈寶翰于庭語諸子曰懿訓昭然爾輩所宜恪守
不可使後日謂外宗恣橫自吾門始以上虧 聖母
之德覆車在前深可鑒也諸子奉教命循循一軌于
禮度下至僕御亦皆斂迹市里無敢縱者又性慈祥
諱言人過人有善稱譽若不容口聞人疾若惻然憐
之甚于己身嘗手調匕劑濟人貧不能葬者給之棺
槨歲不下數百他所施舍賑卹多不可紀忽遭疾以
萬曆癸未十二月十三日卒距生正德庚午正月十
八日享年七十有四訃聞 聖母與 上震悼無已
爲輟朝一日賻贈加等賜諭祭二十壇勅有司治葬

贈太傅安國公謚莊簡尤爲異數云配王氏封夫人
子男三長文全次文貴並中軍都督府左都督文全
婦田氏繼吳氏文貴婦俞氏並封一品夫人次進御
馬監太監次女適平江伯陳公王謨子錦衣衛正千
戶胤徵孫男四誠銘誠鉞誠鑛誠錫孫女八長適左
都督朱公希孝孫錦衣衛指揮同知應梅餘幼文全
等卜以今年月日奉公柩葬於阜城關八里庄賜地
墨衰過某列公行事嗚咽請狀某與同里習知公謹
厚謙挹無戚里富貴態其所稱述皆不虛遂次第其
語爲狀備鉅公采擇

卷之三終

焦太史編輯國朝獻徵錄卷之四目錄

駙馬都尉

李貞

梅殷

黃琛

郭鎮

李讓

趙輝

石璟

周景

樊凱

林岳

崔元

全校

刊

焦太史編輯國朝獻徵錄卷之四

駙馬都尉

駙馬都尉右柱國曹國公李貞

貞世居泗州盱眙縣後徙臨淮之東鄉性孝友敦
 謙謹尚皇姊長公主元季中原鼎沸貞見里人有
 其田宅厚自封殖者輒嘆曰此何時也乃欲為富家
 翁耶遂捐家貲椎牛豕具酒食會鄉里約守望相助
 居無何亂兵入境時淮東猶為元守貞挈家避地淮
 東久之聞 上在滁陽乃携其幼子文忠西奔出入
 亂兵中草食露宿幾不能存活日夜籲天冀保完父

子逾一月始達滁陽見上時甲午冬十有二月也
上見之大喜衣食供具之甚厚貞父子自慶幸曰吾
與汝脫離禍亂得至於此可謂再生矣况又得所依
恩幸之厚其何以報文忠時年十六沉毅有勇智
上甚愛之曰吾甥猶吾子也教養之備至命從征討
歲戊戌天兵下嚴衢婺處諸郡命文忠開闢於嚴州
以經略郡縣之未附者貞自金陵往就養乙巳張士
誠遣其部將由烏石山犯嚴州及諸暨經兩月不解
嚴人大怒貞心自不安乃權掌軍務令文忠引兵擊
敗之六日而還人賴以安丙午上大發兵平兩浙

命文忠以所部兵水陸並進取杭州貞復權掌軍
兵出桐廬俘其守關之卒送居嚴州俘卒至嚴見城
中勁兵悉出陰有叛志貞覺之因饗其衆至醉悉擒
之送於京師上甚喜文忠兵所向無弗下者杭州
平留文忠鎮守貞復來就養又明年爲洪武元年
上卽皇帝位封貞爲恩親侯初貞將避兵淮東而皇
姊薨權厝里中及是上念之不已追封爲孝親公
主勅有司具喪禮還葬於先隴貞時在杭上思見
貞形於夢寐時遣中使問起居三年上欲朝夕見
貞賜第於內城西偏召貞就第加特進榮祿大夫駙

馬都尉右柱國曹國公追封孝親公主爲曹國長公主貞年近七十旣就第勅免朝常贊拜不名 上幸其第錫宴皇太子諸王亦常往存問貞跼蹐不自安但以手拊心曰恩義深重言莫能報是時北方旣平餘衆遁走沙漠五年 上命將出師殄之授文忠征虜左副將軍以行師出嶺北遇五月捷音未至 上頗以爲憂召貞入便殿諭意貞進曰天生聖人承中華之運陛下洪福齊天海內盡歸職方彼元氏區區餘孽假息沙漠不足憂也捷音行且至矣願勿勞聖慮未幾文忠果奏凱而還車駕復幸貞第錫宴懽

甚貞以表謝并辭祿賜表曰臣伏蒙 聖恩以孝親

公主之親寵賜府第自揆何能叨榮至此臣生長田疇弗勤稼穡惟知食力何望顯融初年特蒙 仁祖

皇帝不以臣之庸愚俾居子壻之列久在侍下撫教之恩思之無窮報之罔極繼而中原兵起室家無存獨携幼子避難他方寄跡於豺狼之區奔走於荆棘之地命危朝露豈意生全欽惟 陛下興師仗義應天順人握乾符而興帝業奮神武而拯黔黎四海歸心羣雄率服臣之父子幸遇 聖明脫塗泥於衽席濟垂絕而更生收養掖庭待以肺腑臣之幼子文忠

蒙然童穉承再造之恩扶樹教育俾能成立指授神
筭鎮守邊陲未効纖毫以禪聖治是猶螢爝之光依
於日月蚊蚋之響附於雷霆以致武功之成亦預分
封之例祿食一品位列上公下至愚騃小孫景隆亦
叨職於侍衛衣冠焜耀於三世恩澤滂沛於一門揆
今食祿之家未有過於臣者緬思往時之艱苦豈意
今日之榮華尺寸絲毫莫非 帝力陛下憐臣之老
賜以免朝憫臣之愚待以殊禮屢蒙車駕之幸臨時
沐皇儲之眷顧寵錫每頒於天府爵祿復厚於子孫
恩意之隆言辭莫罄方今朝廷清明法度具舉官不
虛設祿無倖食臣每存知足之戒恒切盈滿之懼
之俸祿在所當辭伏望 聖聰俯察微忱准臣所請

庶幾情悃之獲伸稍追素餐之深愧臣自憐衰晚補
報無由伏願 陛下壽同天地宗社尊安裕綿福祚
之長永樂太平之治益貞以國家爲念子雖在側有
晨昏之奉不以爲喜或奉命征伐四方久勞於外亦
不以爲憂其篤於忠君至此是年春三月文忠扈從
秦王晉王之國至六月還僅五日貞得疾忽不能言
上聞大驚卽幸其第聞疾上執貞手問曰還識朕
否貞仰笑以對 上洒泣嗚咽不能止有頃 上還

宮中使相繼問遺至是薨年七十有六 上震悼輟
視朝三日車駕臨奠追封隴西王諡恭獻十有二月
庚申葬於盱眙縣靈跡鄉斗光山之原從長宮主兆
發引之日車駕復往望哭於西城樓長公主性至孝
未下嫁時事父母善承旨意甚鍾愛既嫁助貞治家
尤極勤儉事姑舅恭順好修善行平居鮮食葷肉夜
則禮北斗日以爲常前貞二十八年薨臨薨之時神
識不亂端坐而逝貞繼配陳氏封淑德夫人貞篤於
孝敬太夫人性嚴貞微忤其意輒加叱責貞嘗侍食
值太夫人怒投其食噐於地貞徐拾之食如初恭敬
愈至有弟四人父旣沒求分財異居貞語之曰父沒
而母在苟分財異居老母得無不可於意乎先人田
廬俱候老母百歲後隨所欲取之吾不較也諸弟皆
愧服及貴顯姻族有流寓外方者必請於 上而收
之嘗言人之生世貧賤富貴當不改所守一旦富貴
而忘貧賤君子不爲也平生衣取適體食惟適口
上不時賜衣幣必緝之雖一帶幣亦必藏以待用或
奉養太豐輒不自安召子孫集於前懇懇言未遇時
事以曉之曰吾家素涼薄叨沐 上恩以至於此雖
日日美食盛饌何患不繼然奢靡之事吾性素不喜

也今上方以勤儉化天下吾爲戚里之長苟爲奢靡何以勸率家人汝昔念之其儉約蓋本於所性云

駙馬都尉梅公傳

鄭曉

梅公殷歸德人汝南侯思祖從子洪武十一年尚寧國公主爲駙馬都尉恭謹有謀能騎射諸駙馬中高皇尤愛公嘗受密命輔建文君靖難兵起公克總兵官鎮守淮安悉心防禦文皇假道公割使人耳鼻口授詞答文皇曰畱汝口與殿下言君父恩義文皇竟不得道淮安乃渡泗水破盱眙出六合至京師卽帝位公尚擁重兵淮上上遣公主招公公主嚙指血爲書付李中使至公得書慟哭問建文君所在中使曰去矣公曰君存與存君亡與亡吾姑忍俟

之乃還京見 上上曰駙馬勞苦曰勞而無功永樂
二年冬都御史陳瑛言公招藏亡命私匿胡人與女
秀才劉 朋邪詛說幾得罪明年冬入朝公讐家都
督 湯指揮趙曦令人擠公死篋橋下曦又誣公自
投水死都督許成發其事 上怒罪深曦二人對曰
此 上命也奈何殺臣 上大怒立命力士持金瓜
落二人齒斬之謚公榮定初公主謂 上果殺殷牽
衣大哭問駙馬安在 上笑曰爲公主蹤跡賊無自
苦公主謹護二子順昌景福上以順昌爲中府都督
景福旗手衛指揮僉事賜手書二甥曰朕不念爾母

爾安得至今日二甥後改孝陵衛指揮使宣德中與
世襲孫純舉進士爲中都副留守或曰公主嘗貽書
阻靖難兵 文皇不答兵至淮北與公主書言興師
不得已故令遷居太平門外勿罹兵禍公主亦不答
公主 高皇后長女后二女次適歐陽倫倫犯茶馬

禁苑 吾學子編

國初李曹公掌國子梅都尉攝山東學政皆一時文
武才

驃騎將軍駙馬都尉中都留守司正畱守武昌

黃公傳

國史實錄

琛舊名寶武昌人歲壬寅以帳前叅隨舍人擢兵馬副指揮上愛其謹厚命尚皇兄蒙城王女甲辰爲聚寶門店官乙巳授管軍千戶尋改龍江衛守禦千戶累從王師征討及鎮守畿甸多著勞績洪武元年封皇姪女爲慶陽公主誥曰惟天惟祖宗佑我國家開茲洪業王室之親皆同榮顯况在宗女允爲懿戚用稽古典宜有褒封皇姪女長自家庭已歸良壻茲者朕登大寶頒以恩光宜守婦道之常益加恭慎母以

天派自高驕其夫家當脩闡範以來令名可封慶陽
公主授寶駙馬都尉誥曰郊畿鎮守旣爲能臣甥館
擇賢且爲懿戚此國家之所倚重者也前龍江衛守
禦千戶黃寶氣鍾偉節才練武韜從軍拓地於金華
鼓勇收功於江右其勲勞可謂著矣嘗守儀真克冠
千夫之表旋從右相更聞屢捷之勲及鎮龍江嚴司
虎旅按茲堅壘靖我遺疆念其尚主於王家是用陞
官於駙馬寵以銀章之貴頒諸綸綍之新益懋殊功
副於嘉命可授鎮國上將軍駙馬都尉旣而兼明州
衛指揮使未幾改淮安衛指揮使三年改名琛四年

授誥曰昔者帝王皆以分封天下爲心朕遵古典其
於設官雖親必選勲能而任之世其名爵以榮之所
以示公道也鎮國上將軍駙馬都尉兼淮安衛指揮
使黃琛征伐戍守勤勞有年今天下已定宜共享承
平命爾仍居前職令其子孫世襲指揮使爾尚益加
慎恭勉其心力明紀律而嚴訓練撫軍士而安庶民
永保祿位延及後人可鎮國上將軍駙馬都尉兼淮
安衛指揮使後禮部奏稽古公主之制皇姪女宜改
封郡主夫正稱所得授官琛當上駙馬都尉誥命上
念皇姪女惟此一人不忍遽加降奪命仍稱公主歲

給祿米五百石珠亦稱駙馬止食本官之俸十四年
擢中都正畱守授驃騎將軍至是卒年四十九歲計
聞上悼惜之賜葬鳳陽白塔之源子鉉以恩擢左軍
都督府都督僉事

駙馬都尉郭公壙誌

方孝孺

公諱鎮字彥鼎姓郭氏世爲鳳陽臨淮縣人父英以
才勇善戰從太祖高皇帝定天下爲時名將賜號開
國輔運推誠宣力武臣元勛柱國封武定侯夫人馬
氏公何氏出高祖諱山甫曾祖諱聚以侯貴皆追封
武定侯祖妣卓氏曾祖妣趙氏皆封武定侯夫人公
故大家伯父子興以軍功封鞏昌侯追封陝國公謚
宣武而姑氏復爲高皇帝妃公以勲戚子弟資貌潔
脩儀正詳謹朝謁之際上屬目班行獨心喜焉洪武
二十二年遂選尚永嘉公主賜金玉帶鞍馬金繡衣

九襲拜駙馬都尉歲食祿二千石時年甫十七好學
工詩熟於禮度每命練兵綜事於外恭勤不懈中外
稱之三十二年閏五月高皇帝崩今天子卽位復命
賞遼東兵事已而還中途疾作至京師不能朝詔國
醫視之卒弗愈以元年正月薨於賜第年二十有八
事聞天子輟正朝三日歛及葬皆遣官祭諸王亦遣
祭奠子三人曰蘭蕙荃皆上所賜名以是年四月十
五日葬於應天府聚寶山喪葬之具一給於官不以
煩其家嗚呼公父成功於先而公嗣其富貴以承恩
寵能恪恭於位今聞有稱可謂賢矣生不永年無以

竟其志豈非惜哉且著始終納諸幽堂庶後之人
敢壞傷

駙馬都尉富陽侯李讓

李讓舒城人父申畱江南指揮同知讓燕邸儀賓靖
難兵起率府兵執謝貴等取大寧戰白溝河有功掌
北平布政司事佐 昭皇居守防禦有功建文君聞
之大怒欲誘致讓且宥申讓不肯顧其家力戰破平
安兵九門建文君遂殺申沒其產并殺諸男并族居
人沒其幼子婦女異姓姻屬盡謫戍邊讓聞之慟哭
誓死戰益力永樂元年進駙馬都尉封富陽侯食祿
千石掌北京刑部事卒贈景國公謚恭敏子茂芳嗣
侯坐事奪券子與天順元年詔與伯爵卒子欽成化

十五年嗣

駙馬都尉趙輝

駙馬都尉趙輝直隸江都縣人以蔭授府軍前前衛
千戶直皇城內門 太宗皇帝偶見之奇其貌選尚
寶慶長公主歷事 六朝眷遇隆厚宣德間降勅有
練達老成之褒正統間命掌南京左府事尋委奉祭
孝陵景泰初欲詣 闕報効以殺醜虜以紓痛憤
朝廷嘉其忠勤成化十四年三月卒輟視朝一日葬
祭如例輝人物修偉麓知文學好賢禮士然窮奢極
欲而克享高壽或謂其有得於養生之術云

駙馬都尉石璟

璟直隸昌黎縣人府軍前衛千戶林之子尚順德長公主正統十四年督官軍隨駕北征天順五年曹欽謀逆璟率衆赴敵擒達賊脫脫上聞特加獎勞成化十四年命往南京奉祀至是卒計聞輟朝一日遣官諭祭命有司營葬

駙馬都尉周德章傳

崔 銑

景字德章美姿貌廉靖詳雅天順辛巳選尚 重慶
公主叔兄冕又舉鄉試第一人周氏鼎貴聞於河北
重慶主 憲皇同母女兄寵愛亡與比賜金珠玉
帛山積而景持儒行篤好文史能爲詩日從翰林名
公請業受益奉賓客器用磁漆脯修取諸市中三子
侍側獻觴布席竟日不敢休贈遺諸兄暨從子不虛
歲後掌宗人府事弘治乙卯卒年五十子忠錦衣指
揮使孝都指揮使賢指揮同知庠千戶

駙馬都尉樊大振傳

崔銑

樊凱字大振安陽大韓村人少給役至縣令見其狀
貌驚令學凱長身玉立美須髯成化初選尚 廣德
公主凱與周景同鄉主行又同凱慕景為人襲其行
事景傾心與友凱亦能爲詩成化丙午命統禁兵日
介胄升殿侍衛正德初劉瑾用事自公卿以下莫不
折節而凱獨不屈嘗曰凱幸託主爲朝廷肺腑戚縱
自輕柰辱主何所統卒王某者瑾鄉人也有心疾凱
數掠治某知瑾惡凱正值瑾出東華門將升肩輿某
稱寃狀列凱受禁卒金且多私役者遂罷凱侍衛凱

不屈
於劉
瑾

善論事有康濟心今附其一二河間諸郡民貧役苦
又繁生子越兩人卽闢之是時貴倖者在諸郡子弟
列土封伯廝養富埒卿相民益冀倖每歲終禮部納
用數千人不與者猶數千入部中譁自尚書以下反
避匿凱曰此已無家故志意蘊憤誠得發遣使事藩
王嚴禁後勿得闖不二年此患息也論團營軍曰軍
太半私役矣不卽受錢代人役或負擔以生逮操弱
弓敗矢取具臨時食頃罷一旦有緩急非但不可賴
亦不能集宜於都城東曠郊指揮以下將兵居各立
保伍毋得他出給兵符爲信且守且練有事命將往

統之斯強榦而制枝矣子琦瑤俱錦衣指揮同知琮
百戶安陽人又有李讓李堅宣德中皆尚 主子孫
亡居安陽者其世莫得而詳也

駙馬都尉栢岡林公墓志銘

毛澄

正德戊寅九月二十二日駙馬都尉林公卒訃聞

上震悼輟視朝一日賜米百石布百疋寶鏹萬緡命

工部治葬遣官祭者十有三諸親王皆祭如制蓋優

典云公林姓諱岳字邦鎮別號栢岡其先浙江寧海

人洪武初徙實京師隸水軍左衛曾祖普貴祖某父

芳應天府學生以公貴授兵馬副指揮贈承事郎母

汪氏封太孺人公生而秀穎方數歲輒知向學稍長

通尚書大義習爲舉子文明暢可讀鄉先生以遠器

目之年十七選尚憲廟德清大長公主授駙馬都

尉賜誥命及玉帶蟒衣蓋自始被選廷謁入覲 兩
宮賜賚已優厚皆異數也弘治壬戌 天子有事於
南郊命公分守長安右門迨今 上命乘肩輿出
入時節若 帝后忌辰數遣祀 山陵正德丁丑孟
春享 太廟禮益嚴公實承 詔攝行將事祇慎公
立朝寢久國家任使當益重眷顧方隆夫何不能待
其得年纔三十有八而已惜哉公爲人温雅不欲以
富貴驕人與士大夫處敬恭不怠暇日閉戶焚香讀
書不輕出事親孝承事公沒哀毀骨立蓋卧病久而
後能起太孺人少有不豫晝夜躬視湯藥及已病篤
值太孺人亦有疾懼其聞而傷也戒勿以告家人不
得已告之比臨視哀感憤亂絕而復蘇戒其子鹿曰
吾母若母若等當務孝養勵志讀書勉自成立毋徒
恃寵祿爲與錦衣相好甚凡宴集游衍必偕視季父
茂猶父供奉殷勤每先其意念從兄應天府學生山
遠在南都使逆至京邸相見甚懽畱數月不忍別至
待諸族黨率從厚云公二子長鹿次薦

特進光祿大夫柱國太傅兼太子太傅駙馬都尉掌宗人府事京山侯左柱國謚榮恭崔公

神道碑

嚴嵩

嘉靖乙酉夏六月某日京山侯崔公卒於位訃聞皇上嘆悼輟視朝一日錫之贈謚諭祭一十六壇命工部給棺槨營葬事公在弘治間尚永康太長公主孝宗皇帝之女弟也先是戊申十月主薨賜葬於都城南下馬社榨子口之原至是啟壙而合葬焉公諱元字懋仁太原代州人也曾祖諱璟隱德弗仕祖諱震山東泰安州判官考諱儒太學生三世俱以公貴贈

京山侯加贈太傅兼太子太傅妣俱夫人公少從泰
安公宦邸受毛詩尚書泰安公薨有異徵曰是當大
吾門乎果被選尚主拜駙馬都尉公美姿儀博覽羣
籍善詩戚畹諸貴皆自謂莫及公卿大臣折行輩與
之交賢聲翕然聞於時敏慧有謀朝廷每有大遣命
必屬之正德己卯江西逆濠圖爲不軌武皇命公偕
都御史顏頤壽齎勅往諭行至浙聞濠已反乃旋武
皇晏駕公承昭聖皇太后懿旨齎金符詣興邸奉迎
今上皇帝入嗣大統上一見知公可屬大事凡有謀
詣輒咨詢之嘉靖改元以功封奉天副衛推誠宣力

武臣特進榮祿大夫柱國京山侯食祿一千五百石
賜誥券奉命護孝惠皇太后梓宮葬茂陵又奉命之
安陸奉迎獻皇帝神主來京命掌宗人府事上册皇
天泰號命公克捧冊表受使禮成加太子太傅上南
幸承天命公偕勲輔五臣扈蹕騎從途遇親王朝見
命行殿侍班上渡河侍舟中賜詩命和車駕還京遂
命護獻皇后梓宮南祔顯陵事竣慰勞有加自是召
直內苑時承顧問公明習典制凡有敷對罔不克當
上意又時時撰進文字悉見採用命乘馬禁中泛舟
太液命代拜先聖先師於永明後殿命護孝烈皇后

梓宮葬永陵皇太子加冠命充掌冠使上念公等侍
直勤勞加公太保再加大傅再加特進光祿大夫又
歲加食米一百石他如白金綺幣玉帶麟蟒之服上
尊珍饌異恩蕃賚不可勝紀生成化戊戌十二月一
日暨卒享年七十有二公母第三人允登進士歷官
山東叅政克魁鄉薦次光皆早卒公撫其孤咸底成
立代之親族待以舉火者猶多云長子鳳徵娶尚書
劉公舜卿之女長女適安昌伯錢惟圻封夫人皆主
出俱早卒次子驥徵側室周出公卒後上特恩擢爲
錦衣指揮僉事次女適平江伯陳公長子王謨鳴呼
自古尚婚室者亦繁矣若乃偕老齊壽且膺福履會
遘興運簡託心膺茲其猶鮮儷者哉

焦太史編輯國朝獻徵錄卷之四終



